

惜抱軒全集

冊八

卷之八



惜抱軒詩集九

今體一百十首

寄天柱山人

天柱萬重雲雲中抗棟焚巖花稀見客松蔭獨隨
君浣手旁行字琴心內景文坐忘如著論須與謫
仙聞

入龍眠

策杖向山碧心清境亦幽樹陰藏雨漬花落信風
柔鳥迹交深逕人家面曲流甯當容竝舍終歲記
夷猶

江路感舊

山藏春穀堞岸折石城船白髮尋前路青春似往
年落花江館雨叢樹縣樓煙未逮忘情者臨風故
黯然

野戍

野戍孤無障停舟此作鄰連朝江路冷數點岸花
春白霧離邨樹青蕪向渡人無從商去住試禱水
祠神

江路又一首

無復平生侶重於故迹經春風吹短髮江路數長
亭帆遠橫天白山多跨地青寂寥仍獨往風浪接
滄溟

寄靈谷僧

自昔居靈谷終年聽石湍落花趺坐軟深樹衲衣
寒孤月胸前指千山定後看無緣居士室暫接問
輕安

漫游

東風吹脫鬢毛斑舉世誰如老子頑欲抱龜蓍終

蜀肆豈將詞賦動江關五更竹露聽蕭寺一逕松
風入蔣山越客偶談天媿勝相逢倚杖夕陽間

謝簡齋惠天台僧所餉黃精

衰年不願海山居願舐淮南藥鼎餘但使體中還
少壯更偕兒輩向詩書蒼山旨蓄承分乞白首飛
蓬或埽除想見赤城霞畔路長鑱木柄下空虛

輓陳勤齋中丞

西南地控五谿遐承詔單車往建牙出令蠻夷方
企踵從行琴鶴政忘家山圍幕府秋迴雁霜落旌
門曉聚雅故宅但瞻雙戟在迎歸白旂拂江花

陶怡雲深柳讀書堂圖

我如枯樹託婆娑愛見新條發舊柯往日讀書真
恨少少年如子豈能多風軒百尺搖陰翳雲幌千
秋對嘯歌願得隔窗斜倚聽立深飛絮覆堦莎

王孔翔香雪梅宴集圖

渡江春盡冬初去風雪寒山獨閉門羨殺烏衣衆
年少梅花時節又開樽

讀書秋樹根圖

秋容自老君方少昕夕披尋歲月長不識五車書
就日卻須林葉幾番黃

孔信夫舍人自揚州拏舟見訪將自此適蘇
州章淮樹觀察邀與共觀家伎因作此送信
夫

櫻筍成時燕入堂當軒陰重艸初長共扶白髮三
千丈來看金釵十二行灑座玉船傾若下指塗蒲
席向吳閭明朝萍迹都成憶耳識仍增記繞梁

題右軍帖

蘭亭衆會獨傷懷先墓歸誠誓更哀顯授何嘗較

懷祖扶生或竟遜方回
我眉汶領終難至
青李來禽尚可栽
我亦年今垂耳順
千秋思若坐中來

雨夜

秋館蟲吟出艸根
倚窗塵榻一燈昏
瀟瀟半夜龍江雨
知有寒潮又到門

輓詩
簡齋年七十五
腹疾累月自憂不救
邀作豫

龍飛四載一詞臣
吟嘯江山五十春
莫怪尊前爲了語
當年同輩久無人

一代文章作滿家
爭求珠玉散天涯
替人未得公須住
天上甯無蔡少霞

宮闕前朝迹惘然
隨園花竹獨清妍
故墟憑弔終難免
且願從游更數年

氣聚升爲五色霓
倏然散與太虛齊
海山兜率猶

粘著那更投生向玉谿

作書戲題

遂良舊日鬚皆白祕監今年臂更衰結習欲除猶未盡前身或是永禪師

哭孔信夫次去歲觀伎韻君自遺書乞余銘墓

公子聲高魯廟堂爲余江水溯游長石銘歸託名千載玉版前留墨數行鵬臆恍知從物化人情未可扣天閭清樽急管同聽處依舊烏衣上玳梁

次韻答毛學博

文家俗見鄙千層嫵媚誰曾識魏徵若反清言從正始便同乳穴復零陵有源君導如春水無盡人分是慧鐙愧我尚爲知解縛不成得髓自南能江北青山隱隔層今秋豐穀應休徵東籬正可歸

彭澤左席奚求赴信陵諸物總非長袖舞相看各
守短檠鐙初涼好共尋巖桂拄策僧廊病尚能

倪學博欲爲設食而僕病後畏酒肉次前韻
約爲茶果之會

看花眼霧亂層層蒲柳先秋信有徵渴愛旗鎗烹
似乳鬧嫌壺矢祝如陵連朝苓木衡三品薄晚鹽
虀共一鐙君爲禪房設清供試拈螺蛤小詩能

又示客一首

已識西堂合射艱況教口腹累人間庾郎正貴陳
三九袁粲何須破八關明月清風同入座綠葵紫
蓼總開顏不容更命門徒議早聽周生諫小山

秋室漫咏

積疴謝書冊人事亦無關曠爾一室內秋聲動遠
山廊依風葉轉砌繞露花斑客至希言說依依久

坐還

隱仙菴雙桂相傳元時植秋時花開極盛攜
客及幼子師古觀之因賦

鍾離真主渡江前雙桂蜷枝已刺天南國市朝非
曩日西風闌檻又經年黃金萬蕊香浮閣白雪千
莖冷覆肩零落滿堦君勿歎吾生那得較花堅

漫游

青嶂連江抱隔闌此間容託葛天民垂金花落秋
將老流水光升月又新隱几無心從喪我登山有
句偶驚人每攜巾竹尋蓬藿容有齊梁迹未湮

登清涼山翠微亭下重入隱仙庵看桂偕浦
柳愚山長毛俟園倪健堂兩學博

亭高碧嶂秋風上帆出青天曉日時一攬橫江全
楚勢再尋幽壑小山枝樓前影擢交龍起雲裏香

薰駐鶴知賴接數君情不淺不妨繞樹坐頻移

次韻同年蔣澄川見懷澄川去夏皖中貽詩
今夏始達

江北江南兩岫雲從風偶聚又披紛鋤犁久分終
南畝隴隧今傳誓右軍難得經年通尺素況期千
里合離羣相望都似秋林葉澹倚寒山挂夕曛

毛侯園用僕看桂前字韻作詩見貽因復答
之

萬里清江到坐前又逢佳客九秋天短筇共散幽
憂疾芳樹誰知偃蹇年君輩論文推馬齒世間相
士貴鳶肩止宜不負看花約自斷平生志已堅

問張荷塘疾

君抱幽憂卻酒卮空堂視蔭每同誰今年青女慵
司令九日黃花未吐枝欲起毗耶居士疾愧無天

寶謫仙詞瓦棺閣外江天遠請眺餘霞落鴈時

喜胡冠海至

高樹寒陰落掩扉城頭鍾阜夕煙微青楓江上人
才返黃菊花初蟹欲肥行樂繫錢隨處好論詩燒
燭隔年違黑頭那易身無事且爲頻來趁短暉

天門

艸綠濡須口天青博望門雲山開四面波浪急東
奔地有千秋感人傷垂老魂頻年逐帆影幾處認
潮痕

題畫

橫風吹雨過林邱萬片飛雲作水流倚檻數峯藏
又見渾如天際識歸舟

千巖雲起壓林低黃葉聲涼送馬蹄雨急看山行
更緩野人家止隔前谿

觀明賢在楚宗室宅詠繡球花詩卷郭美命
首唱凡十九人王夢樓跋尾有評繡球花詩
以宋牧仲爲冠語因題其後

往日東風帝子家濡毫上客寫妍華時乖竟值憂
危議春盡難留錦繡花節概青編悲志士文章白
髮笑生涯從游紫柏猶吾願綺語何煩甲乙加

答朱石君中丞次韻

衰年蒼蘊甫聞香那得全將六用藏縱有隨之推
老馬其如後者未鞭羊使君膏物真時雨故侶零
柯怨早霜不貴藥珠傳不死諒公宇定自天光

天界寺閣遇兩蜀僧

南朝宮闕悉榛荆尚有梅檀閣未傾坐看青山圍
建業來從赤脚下桐城殘英偶爾餘春色布穀吟
然早夏聲萬里栽眉僧接鄰小窗深發夕陽明

送方壩堂解官後將之上江

鎖闥將闢始聞名夢過春秋二十更三省最遲麾
出把九州獨許蓋先傾山當蕭寺時停騎身付扁
舟欲濯纓我亦舉頭偕衆望謝公終起爲蒼生
君與名山宿有期那應長閉入車帷好乘腰脚年
來健徧攬煙霞物外奇僧俗總隨雲水宿漁樵或
與姓名知故當飽歷人間路歸見桃花一笑時

重宿幽棲寺

南山東面最孤騫拄杖時攀問法源紺宇中臨千
嶂小黃梅旁出一枝尊春堦雨歇纔懸榻夏院陰
成又扣門深洞了無來去迹只餘石溜滴苔痕

陳東浦方伯招飲瞻園次韻

前代英雄不可尋千秋臺榭敞憑襟欹松立石冷
風度暗艸叢花夕照深官閣留傳多故實謝公寢

處愜山林酒闌倚檻容吟嘯無那高垣易夕陰

次韻答吳竹橋

稱病君真似長卿我如蒲柳老無榮文章已謝當時好止足甯希史傳名獨立懷人常企踵相逢狂論復盱衡清詩泠若臨風笛吹徹秦淮秋氣生

題吳竹橋湖田書屋圖

中田有精舍挾冊青林間起見海東月流光湖上山時聞漁者唱或值耦耕間非得忘機侶翛然自掩關

昔君辭省閣余亦臥江濱山祿垂湖岸宜容澹蕩人藏書多足老資物少無貧更欲刺舟往相從忘主賓

題黟縣朱榮朝望嶽樓圖

記託新安郡晨朝見異峯遙思黃葉逕多被白雲

封孤往未能決他年焉可逢披圖如曩昔惆悵列
巖松

題李抱犢山人僊杖四友圖

君築巖居積翠重飄然偶出似雲龍孤舟乘興行
千里襟被吟詩入萬峯屢痛昔賢披墓艸自希良
友結霜松歸休梅竹蕭疏裏風雪余將策杖從

方坳堂觀瀑圖

泰山北面寒巖谷曾逐谿聲就朗公莫道出山泉
竟去舉頭常在碧雲中

坳堂觀察自安徽返將歸濟南仍入都補官
餞之於清涼山

天門赤岸涉波濤問訊秋來迹已勞風雨才晴將
送遠江山無際共登高重來郭伋誰能必獨立王
尊氣自豪衰眼摩揩瞻事業何妨萬里縱旌旄

題坳堂所藏諸城劉文正公手蹟

獨立清修動主知喟然耆艾在彤墀後來董令
思文偉誰許王宏繼穆之竹素蒼茫千載事邱山
零落百年期寸縑中有平生感曾共山公把酒卮
跋汪稼門提刑登岱詩刻

昔乘積雪被青山曾入天門縹緲間日觀滄溟猶
在眼白頭明鏡久驚顏壯才許國朝天近名嶽裁
詩擁傳還盛藻宜標千仞上衰翁無力更追攀

過蕪湖

不見春江際安知路所經遠隨煙外席時逗岸邊
亭鵲尾雲彌白鳩茲山漸青更投前港宿雨勢復
溟溟

四合山阻風

柳枝搖不息久立望空津帆勢遙投戍濤聲故近